



2,197 PELAJAR BAHARU MENDAFTAR DI UniMAP

Oleh : Mohd Basri Basir

ARAU 28 Ogos – Seramai 2,197 mahasiswa baharu melaporkan diri di Universiti Malaysia Perlis (UniMAP) pada Minggu Suaikenal Sidang Akademik 2018/2019 baru-baru ini.

Jumlah itu dijangka meningkat sehingga 3,000 pelajar bagi pengambilan untuk sesi rayuan akan datang.

Raja Muda Perlis, Duli Yang Teramat Mulia (DYTM) Tuanku Syed Faizuddin Putra Jamalullail turut bercemar duli berangkat hadir bagi menyaksikan pendaftaran pelajar baharu UniMAP.

Berangkat sama, Raja Puan Muda Perlis, DYTM Tuanku Hajah Lailatul Shahreen Akashah Khalil. Keberangkatan tiba baginda berdua selaku Canselor dan Pro-Canselor universiti itu disambut oleh Naib Canselor UniMAP, Prof. Datuk Dr. Zul Azhar Zahid Jamal.

Pada pengambilan sesi pertama itu juga, baginda berdua turut berkenan menyaksikan penyerahan zakat daripada Etiqa Takaful sebanyak RM60,000 kepada UniMAP. Sumbangan zakat tersebut akan diagihkan kepada pelajar yang memerlukan daripada kalangan keluarga asnaf yang terpilih.